

四庫全書

集部

欽定四庫全書

集部

方洲集卷二十四

詳校官編修臣曹錫齡

中書臣劉源溥覆勘

總校官編修臣王燕緒

校對官編修臣嚴福

謄錄監生臣陳廷鑣

欽定四庫全書

方洲集卷二十四

明 張寧 撰

墓誌銘

義官力本許公墓誌銘

海鹽袁花里許氏舊族也先遠失傳家譜斷自四九仕
元提督為袁花始祖二世千六三世曾一四世盛甫五
世海州同知國器六世文英府君生三子其季諱禎字

叔祥號力本是為義官初同知公有機鑒知從子厚材
戡濟險舉全業付之遭時多故竟以訟蹇致凋落再傳
至力本承父命讓遺業與二兄子居東墅始鋤治啟闢
經營構締田宅園池之勝漸出舊觀又善用人力雅達
地利童奴廢壞皆就作食輸勸賑貸祭養宴會之資無
不給具及親歿哀毀特至斂塋祥禪備極情文庶幾終
遠之道久之子紉為賦稅長乃營別業日以詩酒琴奕
自適雖入粟授官性尚閒曠不常御官服時乘小舟縱

匹騎漁獵於荒林野渚之間意趣所便樂而忘疲不知
老之將至成化甲辰二月十六晨起沐浴更衣召子孫
戒飭遺命以廩粟分予諸小疏戚有差無疾而卒距所
生洪武二十七年五月二十九日壽八十有八配張氏
有賢行先卒子二長即紉次紳蚤世女三鄉士祝淇馬
禮翁璇其壻也孫男五洪蚤孤娶王氏清周氏滋俞氏
潭娶祝氏而天淪為弟子員娶祝氏曾孫男三人尚幼
紉以是年十月十六日塋柩於先壟之次奉行狀乞銘

予嘗聞舉墜器者無全功任重負者無餘力力本翁以
末裔起家宜草創不暇考其所成章章明備至其於老
壯貴賤死生之際又復從容不滯其才固有過人然能
卒遂之者蓋以紉為之子也予交紉久知力本翁事輒
序論如狀而系之以銘曰蚤能振宗晚能釋俗富慮多
事壽慮多辱先民所履智者是程始末順度富壽安榮
奕奕丘園鬱鬱喬梓天佑其全爰錫嗣子

澹軒先生墓誌銘

先生姓許名珣字士章號澹軒世家海鹽三都祖樂耕
處士諱政益元季以勇敢稱於鄉考菊莊先生諱伯全
母汝氏菊莊領舉官至樂安教諭先生從宦四方得家
傳之學博通載籍尤長於書為人溫雅靜慎無謔言慢
貌文章主於明理不事華藻累屈於場屋綽有時名正
統丁卯領鄉試第六人明年會試禮部授安溪訓導抵
任未暮以母老援例歸養初主劉氏家塾及是為布政
使白公主延聘弟子益衆御史劉泰市舶提舉鄭延兵

馬指揮向昭州判張彝知縣費琦縣丞劉宗朱瑾舉人
虞勲姚禎寧雖不敏與經歷弟寬亦皆承教從士大夫
之後其間或出或處彬然相望為許氏門人初典應天
府鄉試屢為河南陝西江西徵聘凡三為考官所至皆
得士配碩人朱氏生子男二長名晉邑庠廩膳生娶王
氏次名常娶李氏孫四翰翮翺翹生於永樂壬辰九月
十三日卒於成化甲午正月初七日春秋六十有三疾
革時神氣不亂有辭世詩示後言多經則後三年丁酉

二月二十七日塋柩於先塋之次謹按古禮塋必有志
寧謹述其大略刻石納諸墓下以垂久遠若夫才行學
問之淵懿其平生詩文具見家籍後當有傳非寧所能
盡也銘曰文士多浮薄而先生本於質舉業應時好而
先生根於理仕者驚進取而先生以親故窮其生才德
不獨善而能淑諸人以克裕其後誦詩讀書尚友於先
生者雖百世其將未已也

松庵墓誌銘

處士陳公卒將塋其子璣以巡宰張翥所述行狀請予
為墓銘曰璣童子時常從巡宰公授書課熟知先人事
其言多質實願被以文使足以昭遠久幸甚按狀處士
名貴字仲和號松庵世居海鹽茶溪金粟里祖文德父
仲真皆積德好儒隱迹弗仕母錢氏有懿德生公兄弟
四人長士傑次即公弟士華士信士傑以高壽得官服
而終士華為邑庠弟子員與士信皆蚤世公每哀念之
為人慈祥豈悌敦厚不華善經理家務積勤約以致饒

裕田宅生業至老益振蓋有璣為之子也妻朱氏先卒
時公年甫四十餘輒自斷曰吾見人多矣嫡繼偏私未
有不乖其倫者吾年且老幸復有子夫婦之念不可移
也遂終身不復娶璣配吳氏女一適步全孫男四長名
本娶陸氏次鼎祝氏次立雲皆未冠孫女二長適張鑑
次未笄曾孫男二本生源鼎生濟皆幼公生於洪武癸
亥八月十二日卒於成化庚寅正月初七日春秋八十
有八以次年辛卯二月二十九日塋於紫雲里白朮山

之陽余交璣久嘗至其家及見公凡其言動雖老猶爾
雅狀真能紀其實宜文而銘之銘曰禮始於夫婦恩始
於父子業始於稼穡本之固矣其末必碩不學而能有
美天質謂余不信視公之澤

陳處士墓志銘

海鹽金粟里陳處士既卒冢子本以予為父執求銘其
塋石嗚呼予固當銘也處士諱璣字廷用號竹軒祖仲
真父仲和俱崇儒好義母朱氏有淑德生處士幼悟資

稟清朗沉靜寡言有機略能應世務治家以睦族力本
為先平生恥居人後常先事遠結納無所取應及遇變
故則人自為力緩急未嘗失措用是克大仲和之業為
賦稅長然性好周急扶傷而沮抑諸不負者人頗以是
憎愛之久之亦皆帖服年甫五十即以家事付本營壙
宅於紫雲里先塋之次暇日攜親友徘徊其間曰苟至
是吾事畢矣由其始終論之可謂能人焉配同邑吳氏
生子男四本其長也次鼎立雲春秋五十有七塋柩於

預營之壙予交廷用垂二十年始卒無異仲和甫卒予
嘗為廷用銘之今又為本銘廷用之墓俯仰之間蓋三
世矣予獨無感於其間乎哉銘曰維陳之先公實大之
維陳之後公實載之維宗及黨式克賴之豈曰無友孰
諒愛之公其逝矣誰及代之

虞處士墓志銘

虞氏為海鹽望族世多聞人數傳至清華甫博學能文
衆所稱許子仲堃國初為萬石長以仁厚令終生子士

瞻是為處士之父益重儒術不與物競既沒田宅多散
失業於是乎中衰處士早夜惕勵生聚休息十年而悉
復其故天資英毅儀觀偉然治家教子綽有禮法可方
古人所居有省躬齋秋水軒朴素清雅圖史畢具每延
至賓客輒命綱目通鑑與之語古今成敗事端拱高視
議論如流雖終日未嘗有惰容鄉先生顧孟時朱閔學
皆以儒學擅名於人少與可獨與公往來甚亟相愛終
平生處鄉黨自少以老下者可仰少者可師不善者可

以有憚一時宗工如姚兼善陳惟誠呂逢原倪懷敏輩
皆有詩文稱美可謂為善之應也配金氏子楫克家幹
盤有父風娶馬氏庶子棟善承事長者娶許氏女二人
長適孫氏次適陳瓏處士名澤字巨川春秋七十有七
天順元年塋於阜山先塋之次銘曰行誠於身昭於人
名發乎近著於遠業承於前垂於後越是三者公具有
之謂彼不信請質銘詞

明故亞中大夫河東陝西都轉運鹽使司運使倪

公墓誌銘

成化二十年閏四月二十日倪公廷瞻卒於官子瑛傑
俊扶柩返於正寢卜以次年二月日塋祖塋先期以刑
部郎中錢塘陳洵行狀請銘墓石寧因按節其大者而
敘次之公諱顥字廷瞻別號居易世家海鹽曾祖富祖
潤考政舉鄉試歷官沙河縣教諭母張氏生公於宣德
己酉七月三日自幼岐嶷大父素達理數喜曰是兒必
大吾家長補邑庠弟子員領景泰癸酉鄉試第天順丁

丑進士初任工部都水主事丁父憂服除改兵部武庫
舉陞河南懷慶知府任滿陞河東陝西都轉運鹽使司
運使二年而卒春秋五十有七初娶海鹽處士王玉女
繼娶按察僉事金陵王濬女子男五人英邑庠廩膳生
配太常少卿鄭環女傑儒士配太常少卿何暹女俊增
廣生配溫縣知縣鈕文女仁倫尚幼女二長適御史馬
璇子堃次適知府沈榮子光孫男七懷悅悌恂忱恒忤
孫女一仲弟璋義官季弟璠甲午舉人父母妻初贈封

承德郎武庫司主事太安人安人加贈中議大夫贊治
尹懷慶府知府太恭人恭人顯揚濬發厥有端系蓋公
初在郎署間治泉山東調兵陝西已著時譽及守懷慶
力盡所當為不肯少自暇賑荒捍患植善擊強薄賦正
供具有成績以禮法啟治藩府軍校諸妨民者人用康
肅羣小遂相與媒孽其短將假手甘心於公公覺白之
乃釋久之又有造飛語誣公簠簋不飾下西廠公議沸
騰窮訊一無驗事良解其名益章巡撫巡按者累奏公

政績優等先後被綵段羊酒誥命之賜及任滿去民擁
留塞道遂巡始散吏部兩舉布政司叅政皆不偶始有
河東之薦臨行尚書尹公旻語公曰河東重地知君廉
慎老成暫借一行耳公念母老不挈家惟攜一子就官
其大率如懷慶而尤急其職務恤蓄起弊蚤夜不遑盡
去鹽池宿滂利澤大盈而疾作矣臨終遺命諸子語皆
經常惟以不得終奉老母為恨平生所至作興學校科
第得人士蒙被恩私聞訃多失聲慟吏民皆歔歔悼惜

馬巡撫刑部侍郎何公喬新自悔薦用不早遣人護送
其喪嗚呼寧與廷瞻皆王氏壻洵予故人子與瑛皆鄭
氏壻姻戚遊從見知信明盡廷瞻孝友恭慎沈默坦率
徹内外予夢想斯在不肖南謫時廷瞻方入京別去二
十二寒暑赴河東時僅一會而去宦途履歷予實未詳
讀洵狀始知廷瞻内介外和執謙履果可謂得體用達
經權者矣惜乎甫踰下壽未見其止而遽已也嗚呼傷
哉銘曰洪舟載重兮有駛其行良驥善步兮孰回其程

金玉異用兮隨器著名介潔惟冰兮豐和惟雪累歲一
見兮移日而絕庭槐有陰兮階蘭有香德澤滋茂兮於
其餘芳

童家山墓志銘

成化丁酉二月臨海李處士卒後二年配張氏卒其子
太學生瑛與弟琛合塋於童家山不食之原生死之道
善夫婦之事終矣然皆窮無施不因以表識則美懿將
泯郡人潘大理禎周太守一清按察使高瑛陳選為之

狀事行及稱述論列詳盡無遺其信然乎則二老人於君臣父子長幼朋友夫婦之間無一類有歉飲食言動祭養婚嫁無一事無節自成童在室至為父母以及於老無一日不謹守禮法不獨其文藝工容僅見於外內而已人常言事定於三諸君子之論合其信然矣夫婦道常成於夫而子弟之賢未有不本於父師者處士蚤受業於味菜翁家庭之教又從學勿齋陳先生宜其德器清遠異於他人使得少見於用則宜家教國必有可

觀不止受授於一鄉也惜哉瑛在讀禮時即渡江至予舍請銘墓石詞曰此先人臨終之命也寧以多病未答今三載瑛請益勤孝矣哉仁人之後也雖甚斐陋尚可
以終無言哉謹取節於衆定之論而系以銘曰維蘭有
香蕙亦馨止維鳳有聲鳳亦鳴止干將之藏莫邪其寧
止有茁其芽有飾其毛亦有餘光騰空徹霄

許一樗墓志銘

予友海昌一樗翁許紉用文卒予聞訃而哭及塋而銘

分固宜然第念自甲午歲至今僅一紀耳既銘其妻復
銘其考而今又銘用文變故靡常親舊凋謝於余心獨
無大戚然者乎初用文始祖四九仕元提督始居海寧袁
花里凡七傳至考力本翁遭家多故克讓遺業與兄子
居東墅攻苦率勞復大其業以是用文幹蠱甚蚤聞學
甚豫年十八習舉子業值母病劇繼罹大故憂勤積歲
遂棄其學尋以鄉大家長賦稅先業益振累田數千畝
居室千楹就食者踰六百指內需祭養外奉賓客上輸

官稅下理私訟旁午紛紜不可舉數用文以一身應酬其間各相給集未嘗力詘人有持許遠世系求合譜者用文曰論得姓之原孰非公卿後況遠土族在斯得無流裔相涉第以傳次無據不敢妄援厚謝遣之比嘗歲歉應勸出穀備賑例得給官服用文曰紉所以為此者父命也請以榮吾父有司從之勒石學宮以旌其義及父壽終喪塋率禮吊者交譽先是弟紳夫婦蚤生子女幼孤用文與妻撫育周悉婚嫁產業優於已出其厚本

類如此至於興弊起廢周貧恤匱之惠特末節耳晚年
舉全業各授諸子退處一樗小軒復號師仲冀以聞過
進德老而不倦軒之內列置圖史其外雜植花卉樂與
故人親戚觴詠其間至忘日夕成化丁未三月二十日
晨興覺少不豫遽沐浴更衣悉召子姪使各勉業光大
門戶言未竟而卒距其生洪熙乙巳春秋六十有三配
徐氏賢而先卒子男四清娶周氏滋娶俞氏繼居氏潭
娶祝氏早卒淪娶祝氏為邑庠生有舉才女三人董銓

孫雲朱漢其壻也孫男七從子洪從女一適金淮嗟夫
人常言富則多事才則多慮鄉之齊民孝友文行聰明
果毅所不如用文者多矣而逸生難老乃或過之用文
勤一世汲汲不暇而暇復不久得非才富之所致此予
所以大為用文戚也雖然彼或富而無應務之才有其
才而無敦本之行求其始卒全歸者蓋亦鮮矣然則用
文之所以不如彼者乃所以勝於彼也蓋棺事定尚奚
論哉銘曰洞孔之山孟冬之月昴直其南水旺其北祖

禍同塋夫婦同穴其終惟始其死猶生不覲其貌不朽
其生維天有星維地有水昭晰流傳百世無已

許碩人徐氏墓志銘

予友海寧縣許紉用文妻徐氏卒將塋命其子清奉行
狀詣予乞銘墓石按狀碩人諱某塔下村名族之女父
希賢母俞氏素名有家法碩人柔順聰敏不妄言笑克
孝父母服食未嘗先諸姊諸妹希賢甚鍾愛擇嫁歸用
文事舅叔祥甫姑張氏如其父母處妯娌如姊妹而加

敬慎之凡閨門之修隱然有則人並信希賢家法可重
姑有疾侍養盡瘁及卒哀毀持至始總治內事躬績紡
以率羣下家業益振用文長賦稅常慮其督責病民遇
歲祲輒勸發私積以贍給貧乏由是內外疏戚皆安服
之用文雖有疾役緩急得所未嘗懷內顧憂用文弟用
行夫婦蚤世遺子女皆孤幼教養嫁娶無異已子待侍
媵有禮雖庶孽恩意適均不自知為他人出也子男三
長即清次滋潭庶子一名淪女三長適董銓次適海寧

所千戶孫玉嗣子雲次尚幼生於宣德丁未九月二十
日卒於成化甲午六月初三日春秋四十有八以次年
月日塋於祖塋之次狀又稱碩人在室為賢女既嫁為
賢婦有子為賢母予交用文久斯言庶幾可信因敘述
其事而系之銘曰狀所書銘之與百歲之藏係爾夫

朴菴許處士墓志銘

嗚呼此寧姊丈許公之墓也公諱觀字用賓號朴菴其
先上虞人洪武間充調海寧衛小旗祖潤考普然妣陳

氏兄弟七人公居五子三瑛娶周氏琳高氏璋陳氏瑛
璋先後為庠生瑛食廩累就鄉試不第卒公老疾因喪
瑛益劇成化乙巳十一月卒於正寢距其生永樂癸巳
春秋七十有三年十一月廿五日塋柩祖塋之次平
生謹重質直警敏不露能容人忍已恕過遠惡雖犯不
較甚則微見言意輒已其存也宗族可以稱孝鄉黨可
以稱弟官屬大夫士可以稱淳正之人譬諸布袍蔬食
雖無華美動人而溫飽常需珍奇莫及非不恥惡衣惡

食者孰能知其可貴寧聞先府君初擇壻得朴菴於社
學童子寧方髫髻今五十餘年親戚如手足始終不見
其一言一動之妄謬視履考祥庶幾篤行君子寧垂老
窮獨耆舊凋傷於公之死豈直為姊弟舅甥之私哀也
哉敝而銘將以傳信久遠不敢不稱情也嗚呼銘曰鎔
金其汨兮璞玉其泐兮善人其歿兮嗟嗟斯銘來者其
可質兮

楊冢婦劉氏墓志銘

冢婦諱德順浙江都指揮僉事剛之孫杭州右衛指揮
僉事瑄之女兵部尚書徐貞襄公之外孫生於天順戊
寅十一月十六日成化戊戌正月二十八日歸同官指
揮使楊某冢子輅明年九月因產憂子卒十月十五日
薨錢塘縣青芝塢楊氏祖塋之側卒之日父母哭其孝
姊妹哭其悌僮僕廝役哭其慈姻戚隣里哭其賢為劉
氏者悲其失愛女為楊氏者悲其失良婦更數日未已
其舅氏時用進士狀其行畧曰德順自幼善女紅饋食

其所主進不俟宿誠而精辦及時在父母側謹默如不能言吾舅甥間至今能想其儀容而不習其聲言也天性廉讓父母分以服飾若有慙色歸楊氏僅二年事親相夫敬戒不改其故故兩家驩然無片言間寧長女妻其弟舉歸常稱女姑之美與狀語多合而今又徵諸哭死者之衆可謂定論矣天之於人壽夭予奪何其不相當也予聞春秋女婦賢而得書有備見其歸老卒葬者以劉氏才懿嫁為三品冢婦他日於輅當有服命之及

今雖育而不永然為父為母之事身已備嘗死於憂子
百世而下固楊氏之宗相也志其墓而銘之於禮也何
惡銘曰維崑之秀毓琅玕兮維湘之濕萎蘭蓀兮岐山
之鳳永失其凰兮延平莫邪終當復合於干將兮

亡妻唐氏墓志銘

亡妻姓唐氏諱貞真字淑英其先為山東萊州人代有
顯宦祖威濟洪武初以軍功授昭信校尉調官浙之海
寧衛父鑑母王氏有二弟曰闕洪淑英年十四納吾家聘

後四年始克成禮為吾妻婦道有足稱者然以閨門愛
女未遑整理內務吾母蓋常教之惜乎未盡其懿而疾
作矣先是其父以兵機失律挈家謫戍浙東淑英以少
年遠父母心常怏怏至是有疾益加憂懣馴至不起是
雖天命有定亦人事醞釀之也自奠鴈及屬纊之辰首
尾纔十月耳時以衰門多故殯柩於先隴隙地後七年
其父以恩宥復官予舉進士適自京回爰欲成塋顧榛
莽荒蕪蛇鼠穿穴而柩木毀壞弗堪舉矣不得已而土

塋於祖塋之側用附於太姑焉嗚呼生不能保汝於一
年之後歿不能塋汝於七年之前反而思之無一可者
予罪孰辭焉中心之痛曷日而已乎繼今娶王氏女幸
其有子當令他日合塋我與其母於汝同穴不使汝無
祭祀主也嗚呼死而有知予則云然如無知乎遂刻銘
而志其塋實是年七月五日也銘曰唐之仲女張之冢
婦王氏有子唐寔稱母千秋萬年汝祀終古

亡妻王氏墓志銘

此有明禮科都給事中張寧妻孺人王氏之墓名瓊瓊
字秀瓊處士王公玉女年二十五適張氏初生子貽哲
承孫女蕙貞鸞祥皆幼殤長女恒吉許嫁杭州右衛指
揮僉事劉瑄嗣子舉次女恒清許嫁海寧衛指揮同知
姚雄嗣子麟子雲翰聘海寧衛指揮同知方剛女玉溫
雲翰生九月孺人疽發背卒春秋四十有五成化壬辰
與先妻贈孺人唐氏並塋海鹽縣開濟鄉祖塋於先姑
封孺人丁氏墓為昭穆嗚呼孺人死矣其世系事實寧

忍避遜而使之遂泯哉初孺人祖仕忠蚤孤曾祖妣翁氏守節撫教長配倪氏生四子二女玉行一配唐氏生孺人及二妹二弟濟寬唐性嚴時俞氏祖姑沈氏長姑皆守節家居以禮法約諸子諸姪孺人長女又沈淦淑慧盡愛之為擇嫁會寧喪婦年方二十孺人季父廣靈尹用同為弟子員相知遂納聘踰六年寧領舉始就室遭家不造父母素嚴肅難婦孺人甘心早作晏息無幾微愠見於辭面及勅封父翁及母妻官秩時已分俸歸

養章服冠帔之奉實脫簪珥質衣服以資不足而自處
泊如寧屢奉差遣及禮節所得賜予雖薄物必先遺舅
姑夫黨餘及其父母至有不自沾口體者念未有子所
納妾羅氏許氏謝氏皆出其意撫諭諄復恩禮優洽年
少者親為梳整教以女工或有娠喜動顏色保護鞠育
不知其非已諸妾亦愛敬之若慈母景泰末寧嘗於燈
下草疏偶坐至夜分問所寫云何因為略道其事徐對
曰父母老矣須仔細為之寧未測其意佯為廢閣忽變

容曰為臣當忠為子當孝妾豈敢沮誤正事但官人性急少慮恐言語太煞直撞事不停當也疏入果忤上是後寧每有論奏終不敢以激烈行詞又嘗夜醉歸憂甚潛使老婢詢從者問所由無何始就寢猶寤寐不安詰朝從容勸曰官人既為言官當先守禮法今牌帶在身鞍馬不便酣醉夜行豈得無失願弗再為以妨大節是後凡有宴集必申勸而往時官况蕭條歲常稱貸寧或自嗟咨遽前曰妾見貪暴之官無不壞名取禍向臨行

時公姑父母皆以此戒我恐婦人輩愛豐富以累男子
今衣食雖薄若比秀才時亦過矣不意官人乃更以為
不足自入京及守汀皆從行內外餘十年未嘗一出中
門第二妹從其夫進士倪顥至京居寓近切僅一再往
返而已與寧許氏姊弟寬妻施氏皆相得甚驩終其身
無褻態二女雖甚愛念至訓誡則凜然謹節不少假借
平居非問答無餘言非賓客無兼味非慶會不御金帛
晨紡夜績攻苦樂澹布素不去身蕭然一儒家婦汀廨

有同官妻詣室服飾皆奇貨及去語諸妾曰此婦好粧
適彰夫醜我與汝等目亦不當視寧可慕之耶寧氣質
褊峻無容人量孺人於尊卑疎戚間見有不當意事常
委曲調護定而後言凡事有齟齬寧未得其理與之言
洞中規矩起並不可勝道伉儷二十年一錢寸帛微言
細務未嘗不告而行篋笥所有期與諸子女均之無毫
釐偏無錙銖妄費常念寧父老疾二親亦年高語及輒
悲哽棺槨襲斂之具皆欲預為備惜乎未克畢事而卒

死之日妾婢慟於室僮僕慟於庭親族慟於家隣里鄉
黨州郡交於寧而知之者亦相與嗟悼惋惜嗚呼孺人
不可作矣寧長其年一歲老病相仍中饋無主平生甘
苦得失不復有知而言之者矣况乎疾病婚喪誰當極
力瞻前顧後百念俱灰繼自今所以含哀忍痛未即自
已者以老父尚在幼子女未嫁娶耳豈復有意於斯世
哉悲傷惶惑語不成章書不盡事聊述其槩為之銘而
藏焉嗚呼孺人真不可作矣古云有德者必得其壽此

言尚可以為訓也夫此言尚可以為訓也夫銘曰志之所書妻之允行一詞有妄鬼神是聽孰畀之材孰為之命墓以永存天理斯應

莫用行墓志銘

處士姓莫名藏字用行初號佩觿更素軒其先居汴仕宋隨南渡因家海鹽曾祖秀祖彬考璘母林氏世為善士素軒生有令質奮脫庸俗雅好問學博涉典籍通篆隸行楷書能詩諳有唐人風致善鐫刻得古印章法時

作墨花亦清潤可喜天分過人巧思絕出未嘗一經師授而造詣自及羣君勝集朋儔滿座手執藝文言笑四洽從容酬應不覺其煩承家幹蠱百務一身及招之游講則傾懷信宿了如無營而事亦良辦弟遁病瘵以死調護憂傷無所不至母林氏因喪子致劇疾三歲不能起父患疽瀕死皆刲股作粥以進先後獲愈及歿塋祭合禮哀慕迄於終身所交多名士都指揮牛循嘗聘訓武職子弟邑令丞亦降禮待或致膳飲焉成化甲申八月

六日疾革呼子女教以後事口占一詩而逝距所生永樂己亥得壽五十有八配李氏子男綱縉縉縵孫男一所著有佩觿稿予嘗為之題品又有詠史詩素軒稿予皆未及見予與素軒交三十餘年親故之情何如也寥寥海曲聰明曉暢如素軒者乃不獲少有知而今蚤已凋謝白頭悵絕庸有既耶後二歲丙戌綱舉柩塋於開濟鄉祖塋之次奉行狀乞銘志其墓嗚呼予忍不銘耶維楚之翹兮孰將刈之維駒之皎兮孰克繫之眇義馭

之忽邁兮孰主疾之嗟潛光之未泯兮天將有以緝之
緩齋劉先生墓志銘

此緩齋先生劉傑季俊之墓其先居大梁高祖恂仕元
海鹽儒學教諭因家焉曾祖彥芳祖廷佐皆處士父景
儀以子奉貴贈監察御史母沈氏贈孺人兄弟九人昂
顯達英雄傑泰復常其配錢氏子男二琛瑗孫男四沂
汶濂伊春秋六十有七成化己亥始成塋鄉老長稱其
自幼穎敏讀書過目成誦初從許先生伯全學禮記復

更尚書於進士邵宏譽甫長棄舉子業專意古學通聲
律書數長於詩文諳達世故成化改元修纂英宗實錄
使者至浙舉先生同事甚見委重平生無慢人無競事
無棄物為家賢長為鄉望士為邑禮賓天性和厚未嘗
疾言遽色人謂無愧緩齋之號嘗念鄉黨疎薄為同甲
會以合親友念族屬散遠為松湫雨露會以合宗戚念
食指寢多勢不能保乃聽子姪處分田宅獨與妻子屏
居閒曠以明己志晚年益肆力於學著作煥然德器醇

雅卓為士大夫儀矩予弱冠從澹軒先生遊其家塾先生於予類居尊行而有朋友之義非婚姻家而有式好之情出處殊迹而有資成之道不但一朝夕交際而已病而悲死而慟塋而為之銘予所宜然也嗚呼銘哉尚德君子履坦幽人逸休旋吉有責其身先進同歸後學斯在論世考成可祭於社

刑部郎中沈公墓志銘

奉政大夫刑部雲南司郎中沈公卒其甥朱璣具行實

走二百里來海鹽致公之末命曰必為塋具須張靖之
乃可以銘我隧以是敢請嗚呼公鄉之先達寧以晚進
獲交於公臨終之托予其敢辭公諱彬字元質湖州武
康縣相溪里人裔出漢迷善侯封邑居吳興至伯什甫
始居相溪曾祖政祖士昇皆力田務本考思義甫好禮
飾行克邁前聞仕至廣東南海縣巡檢因公貴封承德
郎刑部主事進封奉直大夫刑部員外郎以高壽終母
馮氏有賢德累贈至宜人初娶歐寧吳氏兵部主事禎

女繼娶同邑錢氏皆累贈至宜人三娶山西都指揮僉
事陳中女先後俱無出公由弟子員領正統戊午鄉舉
登壬戌進士第觀政刑部除福建司主事轉山西貢外
郎正統十四年丁母憂服滿陞陝西司郎中兼領廣東
貴州司事累受勅誥褒獎景泰五年丁父喪起服差理
淮揚漕運刑獄尋以吏部奏薦被召還京履今任天順
五年感風痺疾奉旨回原籍養病痊可赴部聽用竟以
是疾弗起春秋五十有九成化庚寅塋於秀巖山祖塋

之次平生莊重詳雅以忠孝自期讀書不事章句務於會通所作文典贍清淳大有含蓄天文地理醫卜之流無不周知未嘗輕自表暴藏垢匿瑕罕言人過雖素任術者莫測其際職雖在郎署累按大獄勘詳奏疏以能材見稱每朝會祭享必齋宿待旦坐立皆有常度及病歸不能拜起遇三令節猶北向稽首然後謁家廟初雲南司蒞京兆地訴訟山積典禮者多屈於威利公自淮揚還任以廉公自持司事大治後公卿有缺諸大臣累

疏薦公皆不果士大夫至今惜之卧病八年閉門却掃
優佚自如絕口不結世事間惟索其所藏先父母所寄
書履把玩涕泣家人便為持去頃之復然終不能止所
居先世田廬祭器之外未嘗長有尺寸藩臬故舊或憫
其清苦遺少財帛猶却避再三不敢輒受貧病終身一
付之命未嘗自歎先是思義翁念公一子遠仕以公妹
入婿朱昱公因付以家事生二子長即璲次璉至是公
無後昱婦子哀悼極力營葬可謂無負矣嗚呼人嘗言

天與善人公存心制行卓絕於人而文章政事又足以濟用竟以五品官終於下壽至無一息以延祀事天乎人哉將聖賢之言不皆文寓也雖然公固無怨予則何言遂揮淚而銘銘曰連城之壁先毀於瓦礫見之者當惜千里之馬速斃於驚下過之者良訝成敗脩短孰知其然不得其平亦不怨天瓦礫恒存驚下不死玉塵駿骨猶勝乎爾

王處士墓志銘

公姓王名忠字仕忠世居海鹽以田業起家祖福考時
皆早世大母潘母翁氏一以節終公配倪氏子男四人
長玉娶唐氏璟娶朱氏用岳氏瑄沈氏玉有行義人多
推重用由國子生任鄱陽知縣女二長適沈裕期而寡
有司以節聞將表其閭次適寧都訓導周鶚孫男女十
六人經濟弘寰字鐸濟宗子經為郡掾寬邑庠廩膳生
寧與今工部主事倪顯廩膳生向昭唐元士人李顯孫
悅其孫壻也曾孫男四人乾坤雲漢女如之公失父母

早門戶衰弱無厚積弟信與于氏妹皆少強力奉母內承外任居常晏如弟妹婚嫁悉仰給其身信蚤世從子欽振孱弱公撫如諸子翁年高康裕敬養備至稍不悅輒背負以嬉喜而後止至白首不急母子之間所謂更相為命兩不相負者矣為人勁直弗阿不以讐恩廢正義又善知人寧方議姻時尚未釋褐公一見曰不謬也力主成之平生不食兼味卵畜曰口腹之欲物命所關不可侈也自少至老未嘗少自逸曰飽食煖衣無所營

務非所以示子孫法邑大夫歲具束帛賓之鄉飲其為人孝義竝隆動輒有則如此宜其子女孫曾士仕相望得以高壽終天道與善信矣春秋八十有四成化元年十一月十六日與倪氏合塋於城南先塋是年秋寧自禮科都給事中出守汀州便道過家會公塋期妻父玉命作埋銘不敢辭遂述而銘之寧撫念今昔豈能無感也銘曰孝而義直而誠本之固末乃榮子與孫衆且名君子之澤至以升天地鬼神信有徵

王處士夫婦墓志銘

處士姓王諱玉字廷瑞號隱庵考仕忠母倪氏妻姓唐
諱妙慧考節母俞氏皆海鹽人三姓相當子女克類遂
為婚姻父母舅姑悅其孝兄弟妯娌安其常內外男女
各得其分終仕忠夫婦之世官無所擾私無可虞家室
和平喜憂禮備晏然孝友之門皆處士夫婦之力也處
士壽七十有二唐壽六十有八成化十七年合葬於甘
泉鄉祖塋子二長名濟娶張氏生孫乾曾孫紹隆次庠

生寬娶歸氏生孫坤女三長適張寧封孺人次適淮慶
守倪顥贈孺人季適徐耀皆蚤世處士骨肉至親惟弟
妹子女十人耳當時世故不齊無一不關切其意今即
土之日散亡幾盡惟仲弟廣靈尹用與二子在人生於
所親愛何必過苦哉嗚呼處士族姓甥姪甚多具載仕
忠墓志茲不備因處士為王氏宗子故書其本事特詳
銘曰生同德長同室死同時葬同日同穴而封始終一
嗚呼翁母胡可及

錫公瑞墓志銘

嗚呼余尚忍銘公瑞之墓哉友道寥絕朋交不心白頭
素擬之人今復已矣豈仁壽之理果無繫於造物者耶
余不能無疑於君之存亡也君世系具載叔緩齋墓志
君考諱昂兄弟九人而昂為長君兄弟三人而君為長
名珪字公瑞號蘭畹警敏和美形骸脩整天性孝弟居
父母喪既釋服每遇春秋忌臨輒悲泣如初喪嘗長賦稅
奉輸京畿事多齟齬君強力就緒甫還諸伯叔父甚慰

勞之君徐曰事亦如許爾豈有自辦者父友祝仲容孔
世昌死且數年而仲容之妻女儲無儋石君恤問周至
世昌之子迨今為通家諸弟或稍縱必婉辭止之有不
居者輒憂念弗置與人交別白雖明不見惡愛之迹故
人多親之平居自處甚清澹獨先世所遺圖籍躬自什
襲如護珙璧平生賦詠構思頗達而成章可愛是又得
於靜專之力有蘭畹集一卷年三十被疾乃聚方書貯
藥物以自保羸瘦日臻杖而後舉荏苒八年而終春秋

三十有八娶沈氏有賢行子男二曰翰曰渤先是余舉進士赴闕過公瑞道別慰勉之餘出詩卷曰珪不幸夙膺重疾平生百事無堪每見古人風雅思欲模倣一二以記歲月不喻殘喘復假我幾何日爾今所就數篇子為我是正母令有他日悔也當時所觀余尚記憶豈念相去決暮而幽明永隔嗚呼痛哉余力能知詩他日當取遺稿拔其尤以附作者力不能則亦永感於無成之書也嗚呼惜哉遂攬涕而為之銘銘曰謂暴致天兮仁

者宜壽謂剛易折兮柔則何尤蓋死者而有不死者存
兮耿天壤之悠悠

養正陸先生墓志銘

先生諱贊字順德號養正其先代世系譜牒失於兵燹
莫考所自曾祖振宗祖萬一元季為海鹽人父均祥隱
德弗仕以行義聞於鄉配葉氏生子二長為先生自幼
儀觀清爽岐嶷過人甫長雅好文學博集羣書年二十
餘巧思溢發為文章頗以多能見稱聲譽之隆實由於

此初海鹽自元順煩擾之餘文氣衰弱先生獨能以刻
志苦思日就雅望凡縉紳當路道出是州者必問其名
有造見者故鄉之民風里頌之作出其門者餘二十年
先生益深自珍重未嘗率意與人而人益難之其行已
嚴毅莊重晚年益自持暇日則深衣巾屨徜徉於林園
間平居燕坐輒復尋討圖史雖年在衰微而精神無恙
或值元宵除夜猶能於燈下作小楷書頌以教諸孫天
和元氣之節於志誠者至老不衰也先生以世俗湮於

老佛憚禮文之難而喪不成塋著居喪撮要一書以示
簡易士大夫多傳寫之迄今未有能為壽諸梓者蓋可
歎也書法宗智永而自成家篆隸八分間出於詞翰中
平生文事思緩筆精始終無急就之作其不苟如此嬰
疾之晨召子孫語以後事數日而卒春秋八十有三娶
錢氏死之日弔於門者皆衣冠之士其友海昌蘓先生
秉貞合鄉評而斟酌之題其旌曰貞一哀無爵也後七
年為景泰紀元其孫慶隆以是年十一月十六日舉柩

合塋於開濟鄉先隴之側是時老成同學凋落無存未
有為之志者奉先生行狀請銘諸墓予於斯重有感矣
遂序而銘之銘曰貞一之行光於前貞一之名弈世以
傳嗚呼斯文千萬年

南溪處士賀倫墓志銘

處士之先本山東宦族隨宋南渡至浙居錢塘五世祖
惟一元宣徽南院使高祖億嘉興南衙萬戶自是始居
嘉興曾祖傑字罕人仍萬戶職國朝肇復華夏遂解所

佩金牌投幽蘭井遁居平湖號半村道人終身不復仕
祖信字伯循妣夏氏父侃號介石妣曹氏處士諱倫字
文貞介石遣從陳竹隣先生學遂有詩名素善琴自號
樂琴晚居南溪復以南溪為號生二子其長恩治家事
次榮入郡庠授經令大行人姜用貞資費略盡終不倦
春秋五十有二歲庚寅十二月二十七日塋於曲經之
原塋以予常交處士每過從執子姪禮塋之前具事實請
為銘遂按之為志而銘以系之曰其流也有源其作也有

傳克承克裕惟處士之賢

方洲集卷二十四

欽定四庫全書

方洲集卷二十五

明 張寧 撰

墓志銘

張淑人劉氏墓志銘

劉氏諱德彝杭州右衛指揮僉事瑄之女浙江都指揮
僉事張洪之妻封淑人初瑄父剛洪父勇皆先後制閩
淑人又兵部尚書徐貞襄公外孫門望相及德懿有自

年十七歸洪體履茂異絕善婦事事舅姑待娣姒下至
童婢尊卑疏戚事皆得理恪守貞靜而有明決之見深
處閨閣而達門戶之事委心順正而不忘父母之恩子
繼宗五暮而殤年甫芳盛遽勸洪置側室及有娠喜徹
中表維持盡委曲所生子繼祖方彌月躬就褥席切氣
體夙夜不遑懷抱弟舉弱齡多逆常百折調護至襲指
揮僉事猶愛教不置洪盛業多內歲以公務遠行內外
整密無一事缺失此三者使中立非人稍涉觀望則舉

父老當無後洪父死不及見孫洪名位造端亦未必遽
至於此可謂賢孝有識卓乎女婦之傑矣春秋四十有
五以弘治元年塋柩於祖塋之次予女適劉舉於淑人
素親習以所知質都閭君手狀其信然不可使終無聞
也謹志其實而銘之銘曰蘭蕙其萎兮珠璧其毀兮鳳
失其凰安所為侶兮

明故太中大夫廣西布政司右叅政朱公墓志銘

弘治元年二月九日廣西布政司右叅政朱公卒於家

卜塋得近日長子庠生淇方毀瘠次子徵先已應薦北
行托其族叔持廣濟知縣江震事行狀道公末命求予
為墓銘按公諱鏞字廷用號恒菴其先彰德安陽人執
事汴京從南渡居臨安曾祖德貴祖亮洪武初始籍仁
和北廓里考賢以子貴累贈至中憲大夫廬州知府母
俞氏妻繆氏皆恭人公幼穎悟九歲習章句十三能屬
文補邑庠弟子食廩膳初讀尚書進春秋博及餘經史
景泰丙子領鄉舉主司錄其文以進明年會試登柯潛

榜第二甲進士授南京兵部職方主事丁父憂服闋改
工部營繕主事陞署郎中出知廬州府秩滿尋有廣西
之命自入仕後屢乘傳就行事皆立辦丁丑禮部會試
預考春秋卷士論得人在營繕適楚府災民方困食計
以武昌商稅所入業修建人不知費時希事者欲新南
北畿甸行殿及鹵簿公具陳緩急所宜皆寢廬合肥僧
殺其師匿跡服喪舒城民婦因姦殺其夫六安民殺從
弟皆誣逮他人具獄上讞公閱成案廉得實盡平反之

無不心服御史劉君忠魏君秉巡按治地舉奏旌異因
給誥進階有加贈之典都御史張公鵬考覈郡縣復勞
公以羊酒文綺甫至廣西適以軍務行邊紀功蒼梧督
平鬱林賊還師桂林有疾遂得請致仕歸仁和深居簡
出脫却世故日以黃老方藥之書自娛與致仕大理卿
夏公季爵憲副張公鳴玉都閩陳公彥章數人觴詠迭
會於西湖山水之間號歸榮雅會平生崖立負氣慎許
可落落若難合而情致幽深文詞豐蔚意見所至訓應

不窮狀記公少時嘗刳股肉愈大父危疾及母產難復
為之下咽而卒哀痛過瘁信則公之為人大本素立加
以學問之功宜其守足裕已施足澤人發為文章擴為
事業溢為餘藝皆粲然有見而於進退老壯之節尤無
愧於古人也公二子三女孫男三孫女五以其卒日距
生年壽六十有七以是年葬於大慈山之陽銘曰鏐金
瑜玉天下之美產也冠服弓劒珪璧瓚璋為飾為用無
或不良然家不比存世不常得造物秘餘終歸山澤後

之人將惜其所往而不知其所不往者猶郁乎英華之
可即也於乎盛哉

翰林院孔目支中夫墓志銘

嗚呼中夫其就斯墓矣述其行以銘非予而誰中夫諱
立初字可與後更中夫號蘧菴世居嘉興曾祖慶業儒
為鄉校師祖子傑能詩善書考茂字宗衍山東青州府
樂安縣丞妣張氏唐氏中夫生十年宗衍以公事歿廣
西慶遠道中二母守節教養資給極苦辛學始成業正

統癸亥郡守黃公懋選補府學增廣生明年鄉試春秋
第一景泰辛未會試授池州府學訓導丁張氏憂服滿
改常州府學弟子多造就預考順天府及江西鄉試時
稱得士其學務體認造詣甚深於書無所不讀旁通鑒
卜有及人惠然更事久應接頗事遷就及為孔目入翰
林與羅狀元大經友善相切磨始敦本質以為己為功
至是蓋一變矣其所著作詩過盛元名家古文能脫去
場屋氣襲有廣志稿文瀛軒集間載慈幃十詠方牀酒

壺十處士傳皆關涉世故誦其言觀其行雖隔世亦可以得其為人予少與中夫交今老矣每見中夫言及父喪不歸輒哽塞於邑涕泗交下移日不能自止聞人行自廣常懇乞訪求其念根心刺骨至死將不瞑目平生遭家不造克謹小物不肯毫髮輕費惟篤孝一母無少不至唐嘗失金釵尋覓無所得中夫自外歸遽易釵以進勸生毋弗介意以傷母懷二母相為感泣孔子謂生事盡日死事盡思如中夫者其庶幾矣壽七十有二配

潘氏側室陸氏李氏子男七女四孫男五曾孫一弘治
己酉九月塋於嘉興奉賢鄉先塋嗚呼中夫信就斯墓
笑老夫知己傷如之何哀哉銘曰孔子之門為德務要
雖游夏之文不先於曾閔之孝有斐君子洵美不虛希
之則是聖父之徒嗟嗟乎中夫

鄉舉人虞勲墓誌銘

嗟夫勲未可死胡為乎而遽死也勲字舜臣年方三十
有三未底下壽勲父諱楫字彥舟老未及養母馮氏死

未及塋子魯直大者六歲小者閱暮未及教女英娥重
未及嫁妻王氏未能相偕以老弟烈未能相愛以終門
戶盛大前往而後未屬學業勤瘁厚蓄而未克施舜臣
未可死也胡爲乎而至此耶始余與舜臣從雲壑蘇先
生學詩文繼從尙志許先生學舉業天資絕出穎敏不
羣所作文如開武庫而戈戟森然如閱鹵簿而隊伍嚴
整如決江湖而東注之瞬息千里不可一暫止予心畏
之其後一嘗問業于今學士呂公逢原卒學于今學正

曹君以安所造益深遂補弟子員邑庠尋以詩經領浙
江天順己卯鄉薦會試禮部中副榜辭不就入太學以
例還讀書於父母之所苦心刻行至忘寢食因以致疾
會母喪哀戚過度氣體虛羸脾胃敗泄馴至不起其履
歷固予所熟悉也其祖諱澤字巨川平生樂善好義洞
視一世鄉之老成後進無不延譽而仰則之其死也予
嘗銘諸墓至彥舟克邁前訓一成而無所改作其世系
又予所熟悉也夫世有不善身有不善死之可也處有

損於鄉顯有損於國死之可也盜虛名而實行缺久倖位而事多愆死之可也舜臣有一於是哉胡為乎而遽使之死也舜臣所居德正鄉去予舍幾四十里死之前一日予往問疾則有付托之言後一日予往哭之則見其所遺諸詩其辭父曰蚤期祿養與恩封誰料中年運未通辭弟曰棠棣花前日已逋鵲鵲原上正相呼別妻曰平生相負休相怨誓死應煩學古人示子曰耕學他年能勉一嚴君雙目閉重泉他作尙多不及盡載嗚呼臨

危之際言不及亂非常士所可及天能少緩其死所成
豈在人後哉此余所以惋惜而悼傷之也是年冬弟烈
奉彥舟命率魯直二子舉柩葬於夾阜山之陽以銘文
見屬噫余意也因攬涕序而銘之銘曰善惡是非存乎
已好惡用舍出乎人壽夭成敗懸乎命君強力為善而
成其是人皆樂好而望用之迺不克大顯其材以死其
命也夫不然天或將斂其施而歸諸魯乎歸諸直乎

劉公秉墓志銘

予友劉君歿之三月將營塋事第六叔季俊甫率其幼孤以埋銘見屬曰亡姪惟靖之能相知敢以二孺子托不朽之圖於下執事按君考諱昂字孟顥配孫氏生子三君行二兄珪字公瑞弟珙字公現君名璋字公秉幼從外祖宗道先生讀書不甚頽達年十四五頽開悟能詩善文授尚書經傳於士章許先生習舉子業既成以父遺命出壻於嘉禾新坊伍宗序業遂止善經理生蓄諳達世故動合典則鄉人翕然稱宗序得佳壻父之兄

公端卒君哀痛殊絕所遺諸子女嫁娶事一皆君所處
分咸當禮蚤失父母長復曠離兄弟因名其所居堂曰
望雲室曰夢草各有詩文一卷以寫情事嘗念早勤問
學長不成名思欲遠遊通都大府博觀要會以發舒其
抱負會第七叔泰以進士選庶吉士君因侍季母至京
數月而返狀元柯孟時見君深相器重因同榜二十八
人在翰林者賦詩餞送頌美相同此亦可以見公秉之
大略矣天順六年夏自宗序所得腹脹疾彌留歸與弟

珙擇靜室避喧食淡以居逾月疾益急適其妻來候君撫二子曰長使就學成人語畢而逝春秋四十有三子男二相宗相賢是年冬十二月葬於新坊漢溪嗚呼予自童稚即往來君家遊君叔姪間當時門戶全盛少長無虞一門詩禮盎然相望及予從仕十五年間君叔之死者四兄弟之死者三向嘗哭公瑞於京師而銘其墓猶幸同氣之尙存足以敘舊故延情好於將來也不意憂喪之年復見公秉下世哀戚相尋歲月如夢銘文之

作非予其誰哉銘曰裔出大梁族望海鹽出壻漢溪死
遂塋焉丈脩行潔為世所傳生有二子相宗相賢

懷遠將軍海寧衛指揮同知崔公墓志銘

成化乙酉十一月十一日海寧衛指揮同知崔公卒於
家訃至汀余哭諸病中又明年丁亥余謝病還淑人李
氏卜葬公海鹽縣十四都豐山祖塋之次弟章來致詞
屬為墓銘嗚呼余敢以病辭哉按公先世鳳陽縣廣德
鄉人曾祖福仕元為官卒將歸太祖皇帝從征有功授

金華衛副千戶祖英累戰功陞指揮僉事調海寧衛考
忠字宗孝世其職配恭人劉氏生公名端字惟正少有
大志偉軀幹多膂力騎射精捷器識不羣宗孝府君素
善文事所交皆知名遣公從秉貞蘇先生遊周旋俎豆
間多所聞見故能詞翰達事體凡所施設蔚焉可觀代
職時府君年踰六十慕黃老術輕施予賓客益盛小不
稱輒不懌公方廉薄委曲承順惟意所向及歿塋祭無
違禮平居無狗馬之玩暇則觀古圖書接賢士大夫觴

詠盤桓雍雍而已及臨下應事言論英發無顧忌聞者
奪氣即其歸內寬外嚴士亦以此附之景泰間倭夷入
貢還所過求索至攘攷手刃人經浙藩臬檄公防護公
耀兵戢旅臨之以威重倭酋帖伏識者謂聲能動遠海
鹽自此或可以少警正統中有盜倉庫者事干軍民逮
繫甚衆有司素與盜惡傳致其情將因苛小案誅之時
尚書孫原貞巡撫浙知公亟命訊覆及伸理詳允竟以
盜坐主首者餘盡釋大獄斯解其後處婺山民相扇弗

靖詔遣都督徐恭總內外兵數千往勦捕嘗致公帳下
數率勁兵搗其巢穴生擒賊首陶得禮上功幕府給金
牌事平賜金綺楮幣進今秩先是倭夷數寇浙東西邊
其地險遠總督巡治者歲僅一至人習備弛廼廉察諸
道指揮謀略果勇可以固城守者分總要害惟正其一
也會薦疏以聞下大司馬集議以為良便署其名為把
總指揮歲更守所分地嗟夫浙東西衛所十有六壤土
千里列銜攝職者千餘員得材僅若此豈可謂非偉人

哉然公亦因是為感激自許竭精神思慮水陸之行無
一日休用能備舉廢墜致士馬精強而勞頓困憊疾病
係之矣又以無子故過服補劑積熱疽發背過至不起
嗚呼惜哉公同母弟二長即章娶沈氏次甫先卒異母
第一曰綬娶朱氏淑人千戶亨女無子側室朱氏生子
雲僅六月而公就木春秋四十有三死之日士無親疎
人無少長無不驚悼間有垂泣者嗚呼自予祖予父交
公父子間踰三世矣所以感而思公者固非一日之好

也況道遠人亡時之貴賤死生輕重低昂錙銖輒見者
皆是雖欲不思公固能之耶公世仁厚未嘗絕物子雲
必能復始成立之年余庶幾病老尙存舉世德以教之
況銘文之屬予忍辭哉銘曰嘉木合抱柱明堂耶靈草
苾芬薦灌瓚耶登降未具胡然已耶豈美好不足以爲
祥而聲聞迺造物所忌耶或其已定者不可移未定者
將在其後耶嗚呼公其死矣天耶人耶身耶子耶

邑庠康膳生許瑛墓志銘

許生瑛字廷瑞吾姊子也姊適許處士觀生三子瑛其
長志行脩潔質性溫實不事遊戲從澹軒許先生學舉
子業讀書窮晝夜補邑庠弟子員給廩膳近十年累舉
不第憂祿弗逮養念慮蓄積劇致羸弱父嘗隆冬患疽
鑿戒勿近火瑛輒解衣溫被席母性嚴每委曲順事處
兄弟朋友各盡其道雖隣里童僕皆樂其和娶周氏生
男不育惟二女皆幼成化乙巳五月卒年三十有七論
其平生庶幾有子所謂為人孝弟孟子所謂善信人使

得少延而克大焉將必有可稱述而止於是嗚呼吾窮
獨無託於甥亦少有冀況其父母皆老病所遇若此何
以為情二弟琳璋擇以七月十三日塋柩於祖塋之次
吾已處分與瑛妻預營一壙與其穴同封以俟徐擇名
家子以配二孤女其妻深自感刻死而有知瑛尚可無
大戚也因攬涕為之銘曰父母之望兄弟之懷秀而不
實天乎人哉

朱處士夫婦墓志銘

朱處士諱亮字德輝與其室碩人鍾氏平生以勤儉起家積累致殷富婚嫁及時子孫蕃衍二老人年高無恙相敬不衰成化辛丑碩人年七十有八以疾卒處士尚强健無異平日癸卯冬得滯下疾知不起悉財產召福祐鑑三子分收不遺錙銖處後事了無缺悞十月初三日卒于正寢後碩人僅二載其壽同紀是歲合塋於開濟鄉之原鄉之人莫不歎羨公夫婦福壽死葬無不相偶是固出於先定宜亦有所承致予聞處士少壯時好

博少得喪輒自止善推移合散與俗相軒輊家業用是日廣人不見其煩勞晚年亦閒適祈寒暑雨無日不出遊郊市隨其所遇雖村歌野戲亦聽玩竟日未嘗固滯作老人態人益親之同時輩行皆所不及又嘗自言碩人內行修備克綜理家務其實賴之得一日息其夫婦相成始終信非偶然者其先為慈谿人父敬妣張氏始從戍海鹽其三子福娶王氏祐王氏鑑杜氏孫男九人曾孫六人塋之前福率二弟詣予乞墓銘予交公久不

獨如鄉人之歎羨而已銘何能辭銘曰伉儷之良家室
斯光齊福齊壽同穴而藏子子孫孫永世無疆

太學生張公墓志銘

公諱鑑字克明世為海鹽族自幼以俊秀選補邑庠弟子員治禮記善書數沉重有謀能簡別物理容止可度
言論不凡大為士大夫所推重蚤喪父彥昇甫獨任祖
宗一甫之業門戶之事實惟公幹蠱故雖刻意經籍繼
登場屋志竟弗遂正統丙寅以學行老成升國子生餘

十年歷事南北御史臺以勤慎稱乙亥赴尚書選部屬疾卧旅舍往再踰時醫藥罔効馴致不起屬續前數日余與劉侍御世亨叩公卧所問所欲言公嗚咽作聲曰後事非一不能盡言但母陸氏年高深恩未報負誤良多聞吾兒箕將來幸見之當令竭力代養即有不幸公等第語之死且瞑目也及箕至公斂棺已彌月迺集舟車為水陸之備奉柩歸葬於先壠配劉氏有賢行箕將行泣拜請銘諸墓地是固朋友之道也況公之為人守

而未達猶有可傳者烏能不銘遂序次其實而詞以系之曰繫此善人維士之秀才與命運行不值壽儲休委社庸錫爾後

姜處士墓志銘

予友姜君用貞喪其父之三月致書京師以銘文見屬曰孤獲叅盟契於茲十年先君之行惟子是知其不朽亦惟子是圖敢求狀達乃按狀為之誌公名迪字元吉曾祖武祖明之父景文世居嘉興生公甫十歲而祖父

皆喪時兄達客遠弟進尚幼家業中衰公雖在童孺安
祥恭謹克舉廢墜事母氏甚得子道母素愛幼子公悉
讓舊田宅與之自以勤苦立門戶而友愛弗替族屬雖
甚疎遠皆處之有恩與人交一以誠信相與未嘗視貧
富為俯仰宣德間被誣繫獄將罹重憲時連坐者頗衆
公毅然獨任其弊餘得釋後竟獲免正統己未隣火燬
公屋舍略盡守臣將問罪所由公極力為之辯解鄉黨
服其雅量季子諒即用員也少明敏公遣補邑庠弟子

員從章景常習舉子業夜歸必自課其勤惰每讀史至
古人忠節事必呼與語有不善則曰若所當戒也及諒
領鄉薦赴禮部兩以副榜辭歸公訓誨一如平日其略
曰汝荷朝廷作養至此吾非欲汝速富貴以養父母願
他日有官當以清慎舉職使人曰姜氏有子吾雖貧猶
享汝三牲之養也其立心制行類如此公春秋六十配
宋氏有賢行子男三人孫男二塋柩於祖塋之次銘曰
少而聞義長而不渝修其在已而天則迂豈造物之無

微亦冥冥乎有需球琳琅玕出自几席尚有榮光照赫
潛默

吳處士墓誌銘

北溪吳處士卜以弘治二年十一月葬其碩人朱氏先
期二十日處士以寒疾卒于正寢古者士踰月而塋所
以待未備今碩人柩將發引事已夙具而公就木夫婦
始終若有天定者同日成塋於禮為宜按鄉舉人朱天
錫行狀處士諱廷圭世為海鹽永寧鄉人四世祖公綬

建炎時仕至監司曾祖廷珍祖用和考保和皆弗仕保和甫有材幹能隨世和俗以立基業生大夫子四處士行三早克幹蠱父與母陳氏常舉之以勵族人曰此兒必振吾家及長又得賢內助益勤耕織治生事家業日裕兄弟友愛甚未嘗去左右遇賢士大夫知名者傾身結納惟恐弗逮和厚之風可挹惟遇不平事則毅然奮發雖涉險冒禁不直不止常積書延師以家事委祥瑞二子命季子祐與弟禧率諸孫務學今相繼補弟子員

登太學晚年自號北溪漁隱方將優游自適以樂餘年不意尋至不起春秋六十有六其子孫嫁娶名氏壙地先已詳志碩人墓石此特敘述處士世系事行為銘而同瘞之銘曰識能達務才可有為信義是持剛毅時施此處士所以有孚於內外而不為勢力之所移也噫

方洲新塋碑陰志

塋者藏也死者歸藏於土終隨化盡為之衣衾棺槨以斂固之此生者之心死者固無與也猶欲厚葬納生器

置用物於幽冥之地豈知孝者哉寧家素貧薄夙承先訓每塋惟謹具衣衾棺槨男束木帶女戴漆冠約髮削黃楊木為簪喪儀用紙明器用木金銀珠玉一毫不附於體玩器粧奩一物不入於壙雖文殺殷周而質循虞夏蓋亦有所本也近避水患遷塋先孺人自顧年制及時因併作壽藏及附塋六穴男女斂塋之具素仍前規置備已定為我後者臨事久遠各無所增改庶幾前人稱家之意但念寧系出吳興身在老獨不可以不識海

鹽潮汐浸淫土薄地濕不可以為坎為是表之以碑柱
封之以壤樹此乃遵時制而從土宜不敢不力也

墓銘

鄭東谷提舉父信庵處士墓銘

於赫處士惟行之淑胡厚其材胡嗇其福天監孔昭而
應不速信美信庵在此東谷

孫恭人方氏墓銘

孰委精英毓琅玕乎而孰布嚴凝瘁蘭蓀乎而孰訛虫

蠅驚鳳驚乎而孰司鈞衡表閨門乎而

義官錢繼宗宗遠墓銘

潤其居或以資于時自其身延以及後人既固且寧爰
以銘其塋

徐淑人謝氏墓銘

維蔓之豐兮蘭蕙易瘁維靈積陰兮卿雲疾逝彼何人
斯兮嗟此早世

丁處士墓銘

生不苟全死不速朽遺行在人紀述有後

崔淑人李氏墓銘

冰霜寒肅類非長物者至於備暑之用成歲之功非是不可具寒斯冰其肅斯霜於嗟淑人惟室惟堂孤寡之濟一德用光

柳莊劉處士夫婦墓銘

有是夫宜有是婦有是親當有是子賢節相輝慈孝具美後自斯年式克敬止

東川軍民府通判沈徵母陳氏墓銘

夫之益友子之嚴師慈言懿行遠格思亶其然乎狀有
詞百爾箕帚一或茲

温州衛指揮同知陳綱墓銘

龍媒驥駒千里之足也既調既閒亦既就御朝發夕瘠
曾不逮至非德力之繇然實氣數之遭際於乎千金之
骨百世之名視彼下乘其相去豈直死生也哉

呂山吳琬汝秀妻趙氏墓銘

夫婦之道陰陽協同動者畢見靜若無庸無遂無儀聖
經垂戒書卒書塋魯史攸載美不自表善不絕聞靜以
動顯於嗟碩人

沈節婦王氏墓石銘

沈裕之妻王忠之女二十而寡七十而死生不再天死
無祭主烈日嚴霜冰清玉美奏告已行旌封未舉沈氏
無歸附塋考妣嗚呼嗟哉女中君子

廉州府學教授黃楚璋先生墓銘

嗚呼先生通顯之志未就而閒散是居乃能素位自安
推力以及其餘晚以親故全歸官遂古之所謂令終者
歟

處士鎰仲通妻鄭氏墓銘

世德鍾祥慶源錫懿克顯厥宗克成厥配顯宗維何克
敬克戒成配維何克孝克惠玉蘊山輝珠藏澤媚百度
用弘歷世無替淑女之述庶幾無愧

諸立夫母皇甫氏墓銘

章於闇然充於歆然謙順而栗然其先也以承其後也以傳庶幾乎紀叔姬之賢而享其全

魯庵朱處士墓銘

維朱之先來自婺源肇業從仕繇宋及元顯祖之澤漸於魯庵繼禰之宗維漢斯存本支不替有昭斯文

義官何公墓銘

輓輒惟車襲此坦途艤艣惟舟去彼湍流致速靡及視履靡忒既懸既維周道是卒

葉通判墓銘

樸梓合抱深根茂枝弗棟弗梁而以稅櫟遇用惟時進
止惟節枯楊云秭絕此粵藥孰尸其事孰隱於心尚有
芳譽延休士林

懷遠將軍杭州右衛指揮翟公墓銘

翟氏三世皆以武功歷遷顯秩桓桓懷遠克壯前猷超
登大職爰總偏師允異儕匹原其為人典重平實是以
殺或利生戡或輔德此所以壽考令終而子孫無數也

介庵吳公墓銘

九仞之山積壤而起必有所因其末弗圯千頃之波聚
流而深不有旁施其將浸淫高不乘危盈不專濫允如
之人亶其能淑以遺爾子孫之福

周碩人墓銘

女之婉靜或過於柔婦之順事或慊於禮母道慈篤則
弛於教內政寬尚則妨於禮溫溫碩人所向具宜咸正
罔缺閨門之儀豈惟性能君子是資謂此不信請徵狀

詞

中年教諭陳公夫婦墓銘

家室安協子婦儀刑偕榮合窶存順歿寧於嗟乎先生

義官沈公夫婦墓銘

維德之令維位之正維家之順維睦無競於是乎餘子
孫之慶

壽官祖公夫婦墓銘

有積於家內外惟慶有隕自天榮壽惟令爾子爾孫及

爾曾玄昭嗣祖業其永無愆

卷二十五

朱碩人曹氏墓銘

克敬克戒不妬不專閨門之則婦母之賢

怡老處士朱公墓銘

於惟處士有善無惡居常處難所向克若子全於官孫
顯於學壽考康寧門戶清約有以夫處士之所以終其
怡樂也

遺安處士陳公夫婦墓銘

夫義婦聽生順死安千秋萬古有墓於原

坦菴處士向公夫婦墓銘

合流之水其下必深連理之木其末必茂向處士夫婦
內外相濟以成厥家宜其邁德於前而克裕其後者遠
也

行狀

求呂文懿公撰先母丁氏墓志銘事行狀

丁之先世居浙東外祖允中處士始遷海鹽生四子女

母行一二舅曰鏞曰鎬皆先卒今惟母姨一人尚存先
母生於洪武乙亥十月二十八日丑時歿於天順庚辰
十一月二十一日酉時受勅封孺人甫及三載春秋六
十有六將以年月日塋柩於開濟鄉祖塋之側家君嘗
言先母性至孝在室善事外祖考妣既適善事先祖考
妣各盡道不肖嘗記先祖有疾家君與母盛暑不脫冠
服日夕侍側及歿哀徹四隣因致疾骨立幾危臨葬霖
雨不止母焚香籲天大慟達旦修霽塋畢後雨歲祭享

哀敬不渝時外祖妣尚存母嘗延至於家左右順志色
養無違先母生子女三人不肖有姊適士人許觀弟寬
為邑庠生娶施氏不肖娶唐氏贈孺人繼王氏封孺人
孫男女四人甥三人皆幼先母於子女雖甚愛念然教
養極嚴不肖兄弟始終不敢於先母側輕一言笑不肖
少嘗惰於問學家君立柱之母輒驚問家君具言狀母
未嘗勸止且或助之見所為有過犯則終日不言知而
改乃已故不肖兄弟粗知記誦姊於女事之外亦頗解

丈理為夫家所重家君讀書好義性寬平坦率有大略
不屑細務母綜理慎到自閨門及田畝經界耕穫之事
皆所留心各有條理家無棄人人無廢業生蓄有方小
物必惜用是寒家累遭凶荒不罹大艱先母終身不信
用巫覡不布施僧尼女冠曰此輩入人家便壞生理然
矜貧恤老之心恒存也先母聰慧善斷能知人使人於
百里外如面見雖頑奴悍婢無不懷服不肖尚憶少時
有盜夜穴牆竊器物者既覺而去母以蹤跡計之曰是

必某人也初本北來而今南往其志將以滅跡然負重
行不能遠當間道返矣使人急要其路果然又嘗有童
奴息羣鵝於野失寢而亡其半畏將遁走母使人覘所
方向謂之曰汝以鵝與人而反欲遁耶鵝今在某家善
取以歸不汝罪也奴不服母曰緩則盡殺之矣急索之
宜可得人皆疑不敢近奴因突入其家果得鵝於室中
如所失數母性勤儉修潔嘗服布素歲惟一澣濯祭祀
賓客之外食無兼味紡績織紉夜分始寐至老不疲因

以是致疾馴致不起不肖自領鄉舉時家君及先母即以貨賄事為戒及有官又書貧乏不能存此是好消息十字遺寄不肖天順改元夏不肖以公幹道過家臨行母出白金數星曰途中必思所欲飲食者以此為費毋妄取一毫以成不美茲當終絕時亦必有遺訓惜不肖未能知也先母治家能積少而成多棄小而圖大轉儉而為新割愛而成義故先祖考稱先母有丈夫志嘗舉之以勵族人之不立者然事無巨細未嘗專主必白之

家君計同而後行也先祖諱文俊祖妣楊氏家君名翥
母諱妙圓右各條皆先母平生事實非敢擅增益文飾
以揚顯為事但殞絕驚惶中思索未盡詞語不精條列
迷於後先紀載痛於去取幸大人先生俯賜矜憐曲加
採拾惠以銘志永責幽明不肖懷德蒙休何可勝既也
臨書悲咽不知所云

董竹居行狀

竹居處士姓董名慧字如魯號竹居其先廣川人也後

世仕宋居汴故南渡時有為武功大夫者扈蹕遷杭因
賜居焉武功次子諱信仕至文林郎臨安府司法徙海
鹽澈川歷四世是為竹居之高祖諱鎮字仲貞者通經
雋偉慨然思用世值元亂遂隱處海寧泉山志以是稱
儒者曾祖思廉祖彥和考坦庵皆克舉世德文行師模
所以濬發於子孫者良遠故竹居自幼至長孝弟剛介
得於涵養持循務質去華不事章句內外子弟有失道
者誘掖訓誨教以事親敬長之節善者有賴不善者有

警所居自終慕堂獨留意於祠堂器制精備凡事事非
齋戒不入朝夕省謁終其身不間置義田二百畝以贍
三族勸節田六十畝以給族人之孤寡周急田三百五
十畝以備里社之凶荒月望給貧病者人米一斗死者
與之棺無所歸者葬之義塚又建橋以利涉鑿井以濟
行路修葺文廟翼室景泰後數出穀賑飢至五千石屢
授冠帶皆辭後有司謂不可重違始受之尋返初服一
再冠服而已縣令孫剛累請預鄉飲疏公父子事行以

聞旌其門為孝義嘗南至浦江義門鄭氏得其家範文公禮翻刻於家北至姑蘇造范文正公家廟得其遺文以歸業欲趨闕里徽國瞻挹遺風老不果行居常念念配徐氏有內行嫡子謙娶陳氏庶子讓娶吳氏女二祝滄周輦其壻孫男三松梅栢曾孫一壽七十有九塋於南山之陽臨終語謙曰吾強力為善禮下賢士大夫勤一世不敢少自肆者蓋欲保家族以成汝兄弟也家範數十條遺書千卷勸節周急田數百畝吾志與事盡在

於此吾死後汝宜展親益惠加於故常毋徒過庸不篤
以辱亡人吾目瞑矣謙受命遽散米三百石周親近以
表事始嗚呼世常以心迹觀人符其顯密以為定論如
處士者名實已顯於人古所謂達人長者將或是歟
之前謙奉世系事實求為行狀謹按序而歸之其稱處
士者所以原公本心欲見其平生大致也

劉世亨行狀

君姓劉名泰字世亨年三十有八生于永樂壬寅八月

十五日卒於天順己卯七月二十三日配宋氏封孺人
賢而無子二女沈禮俞恩其二壻也君領浙江甲子鄉
舉登景泰辛未進士第由翰林庶吉士授文林郎河南
道監察御史其先大梁人五世祖恂元海鹽教諭因家
於官高祖鞠所曾祖彥方祖廷佐皆積善行義為鄉黨
推重父鳳克繼前志嘗長賦稅母沈氏生母闕氏以君
貴皆贈封兄弟九人昂顯達英傑俊泰復常皆聰明文
雅友愛甚至君年十八補邑庠弟子從士章許先生授

尚書經傳少嗜酒季兄達常微言之即禁不復飲讀書
窮晝夜每懸髮自警領舉時年二十有一乙丑戊辰兩
試禮部率不偶卒業成均大有所得及登第入翰林師事
學士呂公所就益遠平生好古博雅能詩善文工行草
書猶精於法律為御史幾兩考嘗奉勅按治遼東直隸
風裁茂著景泰間內閣尚書江淵遺不法于淮君馳奏
劾之卒移其任天順戊寅徽州民暴橫鄉里致訟當流
郡縣素惡其人論以殊死久不白君卒平反之太平民

有相共殺犬賽神者奸吏襲得犬首詣府告魔呪守守
怒發人大捕訛言相傳民一日死者數人急將盡沒入
大江守悔不能禁君適至即械項告吏使人號於通衢
民始定所至吏服民安邪慝不敢肆天性寬平不立崖
岸至禮法所在則縝密無遺疾作時行部至廣德盛暑
躬行山溪間軀幹充肥濕熱相薄而不得息疾遂成疽
在背至京踰六月疽發背卒先是君度不起以後事語
姪珙令歸告諸兄弟凡棺槨襲斂皆自為具臨終強自

起梳沐索紙筆書一詩其中有清白肯為兒女計疎狂
曾為國家憂之句書畢呼珙曰為我請張靖之來寧入
門大言曰靖之戒今日得易簀矣平生心事足下所知
忠君孝親早圖繼嗣幸及時為之詞少梗復作氣曰尚
有所托古者墓必有表葬者有銘死者有傳鄉先生呂
公吾師柯孟時王廷貴皆同年相知深其文必有傳行
實惟靖之留念不朽之托固所願也萬古之別在須臾
矣詞氣慷慨不異平時語畢呼珙曰棺木了未瞑目而

盡珙以是年扶柩歸塋海鹽祖塋之次

求稽勲沈先撰先考墓志銘事行狀

先曾祖諱貴字仲山世居湖州府德清縣金鵝鄉界牌里元季為張士誠萬戶長時盜賊蠭起各相長雄互為吞暴於是退而糾合鄉社設備預嚴界守人免於難及事平悉衆歸附聖朝調戍海寧衛祖栢庵處士諱文俊實代父行役生先考諱翥字九臯號聞鐘子更號晚香叟洪武丙子六月初六日亥時生成化壬辰七月十五

日卯時卒是年九月初四日丁酉塋於海鹽縣開濟鄉
祖塋與先母孺人丁氏同壙先考年二十四喪母楊氏
四十喪父六十封徵仕郎禮科給事中六十五喪先母
冠帶凡十七年感風痺疾卒於正寢壽七十有七生女
一適里士許觀子二寧由進士入官娶唐氏繼王氏俱
封孺人因無子側室羅氏許氏謝氏寬由監生聽選吏部
娶施氏璿娶百戶陶洪女雲翰聘海寧衛指揮方剛女
孫女二恒吉許嫁杭州衛指揮劉瑄嗣子舉恒清許嫁

海寧衛指揮姚雄嗣子麟甥男三許瑛邑庠生娶周氏
琳聘高氏餘皆幼未嫁娶先考性至孝善事先祖考妣
初祖妣歿晝夜號泣水漿不入口者累日時方暑未斂
至以舌舐唇目間出液感疾幾死祖考病旦夕不去側
割股進粥居喪盡禮塋祭竭力舉無遺度先考夙聰慧
能詩文陰陽鑿卜聲律之事皆嘗究心平生不事家人
生產惟藏圖書數千卷嘗以多財益過為戒所居田宅
自祭養外不肯長益尺寸先考嚴於教子自不孝兄弟

有知即不令伍間巷童稚遊戲稍長遣從雲壑蘇先生
學古文既長遣從澹軒許先生授經業進士親為程課
每至夜分始入黎明便秉燭出促起讀書凡琴奕書畫
事皆聽不孝兄弟就學曰此亦文藝中物所謂為之猶
賢乎已餘事輒戒責不聽寧入仕屢書貧乏不能存此
是好消息十字為警先考性質實好義自不孝兄弟將
入仕悉取前人逋財券書焚之然常以儉約為家範取
予之間外若介密而內實寬平意到即已不令人知晚

年施棺砌路排難解紛人多感其惠獨不近佛老事先考作事皆有法正統戊辰隣火及舍舉家驚惶先考猶從容命不孝輩先收神主次及圖書澤器然後撥捨餘貲而烈焰逼人不能畢事遂使溫飽之業一空餽粥不能繼賴先妣勤儉委曲之力雖懸磬匱囊未嘗乞憐告貸以至今日嘗曰貧乏有時若便作富負事頓喪兒子輩氣節委靡自此始矣先考與人甚和易而大節不踰閑郡邑大夫嘗禮為鄉飲大賓正容謹節凜然難近及

退而家居雖五尺之童亦親狎不忤嘗效故事與鄉老
數人結社更日宴樂方春令節籃輿畫舫酒樽食具攜
妓女歌兒相與出遊郊渚間藉草乘陰留連暢飲親操
絃管度曲傳腔調弄竟日樂而忘疲晚歸憇醉翁牀上
輒命鐵笛而吹或呼侍兒鋪牌博奕興極乃已遇除夕
元宵則列宴張燈召故舊相與乘夜踏歌從以鼓樂燈
月之下望之如神仙如是者餘十年不輟先考自暢飲
中感疾半身不遂在苒牀褥越十八月屢更醫卜百折

不效雖甚苦辛神氣益壯始終無念老悲窮之態獨寧
妻死爲之涕泣失聲曰天何不以我代之失吾賢婦弟
寬方謁選未回留念不已及歸以手捫其面曰汝兄弟
俱在吾死無遺憾也病革問後事具未侍者答以既具
乃舉手祝天曰萬幸吾事從此畢矣言不及私惟遺命
蚤葬及遣嫁二婢子

方洲集卷二十五